



Na području Sarajeva nastavljena akcija Oskar

Priveden Vahidin Dobrača

Službenici SIPA jučer su u nastavku akcije Oskar na području Sarajeva priveli Vahidina Dobraču (1986) zbog sumnje da je počinio krivično djelo organizirani kriminal, u vezi sa neovlaštenim prometom opojnim drogama, potvrđeno je iz Tužilaštva BiH.

U akciji su pretreseni stambeni objekat i vozilo koje koristi osumnjičeni, te zaplijenjen dokazni materijal, a sve aktivnosti realizirane su po naredbi Suda i Tužilaštva BiH, saopćili su iz SIPA.

Dobrača je pod istragom da je kao član organizovane grupe vršio međunarodnu ilegalnu trgovinu marihuane-skanka i heroin. Nakon krim-obrade on je predat Tužilaštvu BiH, odakle su istakli da će, nakon što ispita osumnjičenog, postupajući tužilac odlučiti o eventualnom podnošenju prijedloga za određivanje pritvora ili mjera zabrane.

U prethodnom periodu, u okviru predmeta Oskar u BiH i Srbiji privedeno je ukupno 15 osoba, a posljednja hapšenja bila su 11. decembra kada je uhapšeno osam osoba.

Podsjećamo, državni Sud je nakon hapšenja u decem-

bru odredio pritvor Aliju Lokaju (1957), Nijazu Muharemiju (1963), Hakiji Mehoviću (1961), Agimu Eljšaniju (1963), kao i Vidaku Miliću (1950) iz Zvornika. Milić se početkom januara, uz mjere zabrane našao na slobodi, dok je preostaloj četvorici pritvor produžen za još dva mjeseca. U istom predmetu Nerminu Planinčiću (1976) i Elvedinu Ismailiju (1979) određene su mjere zabrane, dok je Remzija Brkić (1968) pušten nakon saslušanja u Tužilaštvu.

Oni su, kako je tada potvrđeno iz Tužilaštva, osumnjičeni za krijumčarenje droge, kojim je bilo direktno ugroženo područje EU.

Prvi rezultati istrage su ukazali na to da je prvoosumnjičeni od jula do polovine decembra prošle godine organizovao i rukovodio grupom kojoj su ostali pristupili radi šverca heroina i skanka, i to sa područja Makedonije, Srbije i Kosova na područje BiH. Tu su heroin miješali sa odgovarajućim supstancama radi uvećanja mase, te ga prodavali preko ostalih pripadnika grupe u BiH, ali i drugim osobama u Srbiji, Hrvatskoj i drugim zemljama EU.

L. S.